

禮 部 志 稿

一五

卷之三

三

卷之三

三

卷之三

欽定四庫全書

禮部志稿卷二十八

明 俞汝楫 編

祠祭司職掌

薦謚號

永樂元年上太祖高皇帝高皇后謚號儀前期三日齋戒遣官祭告天地宗廟社稷鴻臚寺設冊寶輿及香案于奉天殿是日早內侍先以冊寶置于殿太常寺先設

冊寶案于太廟門外丹陛上皇考皇妣神御前各設冊寶案鴻臚寺設冊寶輿于奉天門外御道上錦衣衛設鹵簿教坊司設中和韶樂大樂如常儀文武百官具祭服詣太廟門外立俟執事官并宣冊寶官先從太廟右門以序立于殿右上具袞冕御華蓋殿捧冊寶官四員各具祭服于奉天殿東西序立鴻臚寺奏請行禮導駕官導上出奉天殿冊寶案前捧冊寶官各捧寶冊前行導駕官導上行至奉天殿丹陛上捧冊寶官各以冊寶

置綵輿內鹵簿大樂前導上乘輿隨綵輿後行至午門  
外降輿陞輶至太廟門文武百官皆跪俟綵輿過輿上  
降輶隨綵輿至太廟中門外置綵輿于中道捧冊寶官  
各于綵輿內取冊寶前行上隨行至丹陛上捧冊寶置  
于案典儀唱樂舞生就位執事官各司其事內贊奏就  
位導引官導上就拜位典儀奏迎神奏樂樂止內贊奏  
上四拜百官同典儀奏進冊寶捧冊寶官以次捧冊寶前  
行導引官導上行由左門入至廟中捧冊寶官序立于

執事官及宣冊寶官之前導引官導上詣皇考妣神御  
前奏跪奏摺圭奏進冊捧冊官以冊跪進於上左上受  
冊以冊授執事官置於案左奏出圭贊宣冊宣冊官跪  
宣于上左訖奏摺圭奏進寶捧寶官以寶跪進於上左  
上受寶以寶授執事官置於案右奏出圭贊宣寶宣寶  
官跪宣于上右訖上復位奏四拜文武百官皆四拜興行祭禮  
如常儀次日頒詔

嘉靖十七年上成祖文皇帝睿宗獻皇帝廟號儀

是歲上肇舉明堂大享禮奉皇考配帝乃告于郊廟社稷以九月十一日尊太宗廟號為成祖謚曰啓天弘道高明肇運聖武神功純仁至孝文皇帝尊皇考廟號為睿宗謚曰知天守道洪德淵仁寬穆純聖恭儉敬文獻皇帝同日異時行禮先期四日太常寺奏致齋太常卿同光祿卿奏省牲如常儀次日司設監設大次于南郊外墳神路之東又次日上常服御奉天門錦衣衛備隨朝駕上至南郊即大次易服詣圜丘奏告文武官例

該陪祀者具祭服于南天門外陪拜其原遣北郊太廟成祖廟昭羣廟穆羣廟肅宗廟社稷壇祭告官以是日具祭服行禮先期一日內侍官設冊寶案四于奉天殿冊東寶西設冊寶綵輿四于丹墀內設香亭于冊寶輿前教坊司設中和韶樂及大樂錦衣衛設鹵簿大駕并舉輿亭官校司設監及太常寺官設冊寶案于成祖廟肅宗廟各神座前設上拜位于二廟殿內正中設具服御幄于二廟戟門左是日早免朝鳴鐘文武百官具

朝服于金水橋南東西向序立文官五品以上武官四品以上六科都給事中皇親指揮以下千百戶等官各具祭服于廟街門內北向序立上冕服御華蓋殿鴻臚寺官奏請行禮導駕官導上隨行至丹陛下鴻臚寺堂上官捧冊寶各置於輿內上出奉天門降轎陞輅侍衛鼓吹如儀導駕官退冊寶輿至金水橋南文武百官皆跪候過輿隨至廟街門退冊寶輿入廟街門陪祀官皆跪候過輿上至太廟門降輅冊寶輿至二廟門外太常

寺堂上官四員捧冊寶由中門入至神御前東西向立冊東寶西陪祀官先赴成祖廟丹墀內東西序立太常寺導引官導上至成祖廟左門由殿左門入寢殿左門請主出正殿奉安安訖典儀唱樂舞生就位執事官各司其事內贊奏就位上就位迎主上香奏四拜俟上至冊寶案前內贊奏進冊寶捧冊官以冊跪進于上右上受冊獻訖仍授捧冊官置于案捧寶官以寶跪進于上左上受寶獻訖仍授捧寶官置于案內贊奏宣冊太常

寺官取冊跪于上右宣訖置於案內贊奏宣寶太常寺  
官取寶跪于上左宣訖置于案俯伏興復位奠帛行初  
獻禮以後俱如常儀禮畢上捧主太常寺官捧冊寶先  
行詣寢殿奉安訖導引官導上出太廟門東乘板橋詣  
睿宗廟上至廟門外降轎至戟門外太常寺導引官導  
上由左門入上冊寶如成廟儀畢太常卿跪奏請睿宗  
獻皇帝謁祖祔享遣官捧神主降座陞輿祔享于太廟  
儀具升祔下祝文維嘉靖某年歲次某月某朔某日孝玄孫

嗣皇帝某敢昭告于成祖啟天弘道高明肇運聖武神  
功純仁至孝文皇帝仁孝慈懿誠明莊獻配天齊聖文  
皇后曰適玄孫躬率羣臣加上聖號既畢宣奏之禮用  
申燕賀之情惟我皇祖永歆孝念尚享樂章迎神泰  
和之曲天眷不遲誕降我皇祖夙秉文德聿昭聖武攘  
除姦兇戢寧寰宇維典章未備繫孝孫是補大號鴻名  
卓絕千古寶冊攸躋精禋斯舉將降休兮聖靈騰爐烟  
兮燎炬尚來格來歆以篤天之祐舉冊寶熙和之曲於

穆文祖貽我不基昊天罔極永言孝思爰薦徽稱以協  
民彞勒責琬琰昭哉厥辭以詔于萬世神其聽之初獻  
壽和之曲制帛孔純涤牲腯肥黍稷醴饁蠲潔芬誥穆  
穆孝孫敬德淵微獻享初存仰威顏其靡違亞獻豫和  
之曲于戚武成於昭神功文致太平沕穆皇風樂舞既  
遷禮儀肅雍奠獻再將致其孚願願申佑我孝孫萬福  
攸同終獻康和之曲三爵既登禮秩斯成駿奔就列虎  
拜盈庭匪臣工之虔孝孫之德孔明錫皇釐于普天奠

邦家兮永寧撤饌永和之曲古禮之經有儀有節將享  
既終登歌以徹祀事初成神人胥悅維孝孫之秉情猶  
纏綿其糾結送神安和之曲高皇謨烈我祖是成誕垂  
裕于後昆孝孫是徵稽古酌今恭薦茲尊稱奕奕閔宮  
歲事有恒子子孫孫百世其承之 睿廟樂章迎神泰  
和之曲於皇烈考濬發慶源欽明宣哲敦德允元克昌  
厥祚以釐我子孫筮薦徽稱惟大德是尊惟烈考鑒茲  
臨享如存舉冊寶熙和之曲月吉兮辰良薦鴻號兮受

命溥將日星赫奕兮玉冊輝煌啟中興兮七葉頌貞符  
兮萬方初獻壽和之曲載清酤兮犧尊瑟笙喤喤兮鐘  
鼓於論樂一奏兮爵一獻靈來享兮鑒茲熏熏亞獻豫  
和之曲瑤觴灌兮玄酒登懷明德兮薦椒馨繄昭考兮  
陟降在庭顧孝享兮靈心載寧終獻康和之曲三獻畢  
陳八音舉百辟相予祀事必受敬極兮揚名始冀皇考  
兮綏孝子徹饌永和之曲笙鏞止豆籩徹禮莫愆孝靡  
竭神具醉兮以莫不懌賚我思成兮純嘏是錫降座安

和之曲神之來思天路脩神之去思路寢幽幽既安既妥兮靡淹留奠宗祊兮永錫洪庥

改題

成祖睿宗神主儀先期司設監設香案于成祖睿宗二廟寢殿神龕前設題主案于東置净水刷子粉盞筆墨于上又設盥盆帨巾于東是日早免朝鳴鐘文武三品以上武官公侯駙馬伯皇親指揮各具吉服于廟街門北向序立候駕至陪拜上具翼善冠黃袍乘板輿至太

廟門右降輿導引官導入成祖廟左門由殿左門入寢  
殿上就位上香一拜叩頭畢至神牀前跪太常卿跪奏  
請成祖文皇帝神主恭用奉題上神主前捧主安于東  
案上上復就拜位北向立內侍官洗去舊字別塗以粉  
中書官書寫題主官盥手西向奉題訖上奉安于座跪  
太常寺卿跪奏請成祖文皇帝神靈上神主降殿奉享  
上捧神主導引官導出正殿奉安于神座上就拜位典  
儀唱迎神導引官導上至香案前三上香訖奏復位內